



CONVENIO DE COLABORACIÓN CULTURAL ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA DA XUNTA DE GALICIA E A FUNDACIÓN CURROS ENRÍQUEZ PARA A REALIZACIÓN DE ACTIVIDADES ARREDOR DA OBRA DE CURROS ENRÍQUEZ E MANTEMENTO DA FUNDACIÓN.

REÚNENSE:

Dunha parte, Román Rodríguez González, actuando en representación da Xunta de Galicia, en virtude do seu cargo de conselleiro de Cultura, Educación e Ordenación Universitaria, para o que foi nomeado polo Decreto 148/2016, do 13 de novembro de 2016, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991.

Doutra, José Luis Ferro Iglesias, na súa condición de presidente da Fundación Curros Enríquez (en adiante a Fundación), CIF G32322315, actuando en nome e representación da entidade, segundo as facultades que lle outorgan os seus estatutos.

As dúas partes interveñen en función dos seus respectivos cargos e no exercicio das súas facultades que para convir no nome das entidades que representan teñen conferidas, e,

EXPOÑEN:

Que as dúas entidades son conscientes da necesidade de actuacións de carácter sociocultural que permitan unha adecuada oferta, co obxecto de satisfacer as necesidades en materia cultural.

Que a Xunta de Galicia ten atribuídas funcións en materia de fomento da cultura, de acordo co establecido no artigo 27.19º do Estatuto de Autonomía, en consonancia co estipulado no artigo 148.1º.17ª da Constitución Española. Dentro dese ámbito competencial, a Consellería de Cultura,





Educación e Ordenación Universitaria vén desenvolvendo dende anos atrás unha serie de actuacións encamiñadas á divulgación, información e promoción da cultura, para achegar o máximo posible o noso patrimonio cultural á sociedade en xeral.

A Consellería de Cultura, Educación e Ordenación Universitaria quere acometer a realización de actividades de promoción e divulgación do patrimonio e da cultura galega; mediante a programación de actuacións de recuperación da nosa cultura preténdese acadar unha maior eficacia na consecución destes obxectivos, por medio do desenvolvemento de actividades culturais e de fomento da cultura en lingua galega.

A Fundación Curros Enríquez é unha entidade sen ánimo de lucro que ten como obxectivo dar a coñecer a obra de Curros Enríquez e estudar os seus aspectos máis innovadores e menos públicos. Curros Enríquez foi un poeta dos máis aclamados da súa xeración. Autor de numerosas obras en lingua galega, forma parte, xunto con Rosalía de Castro e Eduardo Pondal, do movemento chamado Rexurdimento da literatura galega, de finais do século XIX.

A súa obra trascende máis alá da súa poesía e cóntase durante gran parte da súa vida no xornalismo. Prestixioso redactor de *El País* e *A Gaceta de Madrid*, o seu cometido informativo levouno a exercer como correspondente de guerra no País Vasco durante a terceira guerra carlista, escribindo unha serie titulada *Cartas del Norte* que publicou no diario *El Imparcial*. Despois dun regreso temporal á súa Galicia natal como funcionario de Facenda en Ourense, finalmente viaxaría a Cuba asentándose na Habana, onde funda o semanario *La Tierra Gallega* chegando a traballar tamén en *El Eco de Galicia* así como no *Diario de la Marina*.

Para o cumprimento destes fins a Asociación conta coa seguinte programación:

Organiza o programa escolar “Vén coñecer a Celanova de Curros e Celso Emilio”; roteiros culturais por Celanova e os seus arredores; X Xornada de convivencia “Curros Enríquez en Celanova”; viaxes culturais a espazos literarios; entrega do XXXIV premio “Celanova, casa dos poetas”; ludotecas para os máis pequenos; presentación de libros e audiovisuais; exposicións; visitas nocturnas teatralizadas polo mosteiro de Celanova e Vilanova dos Infantes, e un obradoiro de poesía visual.





Con este convenio asegúrase a realización de diversas manifestacións da cultura galega levadas a cabo por entidades que a queren dar a coñecer, mediante a súa promoción dentro e fora do noso país, coa organización de actividades que permitan un maior coñecemento dela.

Por isto, para acadar unha maior eficacia na execución de actuacións, dado o interese común das partes asinantes, que teñen intereses coincidentes, é polo que asinan este convenio de colaboración, de acordo coas seguintes,

ESTIPULACIÓNS

PRIMEIRA.-OBJECTO E ACTUACIÓNS

É obxecto deste convenio coa Fundación Curros Enríquez a realización de diversas actividades culturais durante o ano 2018 que teñen como eixo central a divulgación e promoción da obra de Curros Enríquez, así como o mantemento da entidade.

Actuacións:

1-PROGRAMA ESCOLAR “VÉN COÑECER A CELANOVA DE CURROS E CELSO EMILIO”

Trátase dun programa escolar no que se fai un percorrido guiado pola vila de Celanova a través dos textos dos escritores nativos, ofrecendo visitas programadas á Casa dos Poetas, ao Mosteiro de San Rosendo e a Vilanova dos Infantes, onde se visita a Torre da Homenaxe e a Cova de San Vivián.

2- ROTEIROS CULTURAIS POR CELANOVA E OS SEUS ARREDORES

A Fundación Curros Enríquez promove a realización de roteiros culturais entre distintos colectivos. Neste ano 2018 vaise traballar co programa “Celanova: pedra e poesía” e “Celanova: un paseo pola historia de Galicia”.

3- X XORNADA DE CONVIVENCIA “CURROS ENRÍQUEZ” EN CELANOVA

Trátase de promover a celebración dunha xornada de convivencia cos centros de toda Galicia que leven o nome do poeta Manuel Curros Enríquez. No 2018 está programada unha xornada na que participarán os centros CEIP Curros Enríquez da Coruña e CPI Curros Enríquez de Pazos de Borbén.





4- VIAXES CULTURAIS A ESPAZOS LITERARIOS

Co fin de dar a coñecer o resto de escritores galegos e portugueses contemporáneos dos poetas de Celanova e colaborar na difusión doutras asociacións e fundacións literarias, ofrecerase a posibilidade de visitar os edificios e lugares vinculados a obra dos autores protagonistas das asociacións colaboradoras, ademais de promover o coñecemento da súa vida e da propia contorna.

5- ENTREGA XXXIV PREMIO “CELANOVA, CASA DOS POETAS”

O domingo seguinte ao aniversario do falecemento de Celso Emilio Ferreiro, celébrase anualmente o acto da entrega do premio “Celanova Casa dos Poetas”. Como adoita acontecer todos os anos, o acto desenvolverase segundo o seguinte programa:

Recepción do premiado e convidados na Casa do Concello e ofrenda floral diante do monumento de Celso Emilio Ferreiro con presentación do acto e palabras de recibimento por parte do presidente da Fundación. Unha persoa coñecedora da obra de Celso Emilio é a encargada de facer unha pequena intervención sobre o poeta e remata o acto de homenaxe cun recital amenizado por un grupo musical.

6- LUDOTECAS PARA OS MÁIS PEQUENOS

A Fundación Curros Enríquez organiza ao longo do ano obradoiros destinados aos máis pequenos da vila no que o fomento da lectura segue a ser o principal protagonista. Ademais de obradoiros de traballos manuais tamén se realizan contacontos.

7- PRESENTACIÓN DE LIBROS E AUDIOVISUAIS

A Casa dos Poetas acollerá, neste ano 2018, a presentación das novidades editoriais vinculadas principalmente con Celanova. Este ano están previstas as presentacións de “La selva dorada”, de Juanjo Lamelas; “En la casa grande”, de Carmen Martínez Coello; “Mirequelledigo. Crónicas dun filósofo tabernario”, de Manoel da Costa; e “As sete mortes de Leopoldo Pardo”, de Jorge Emilio Bóveda.

8- EXPOSICIÓNS

Ao longo de todo o ano, o segundo andar da sede da Fundación Curros Enríquez, acollerá unha serie de mostras temporais. As exposicións previstas para o ano 2018 son as seguintes: “Xogos de fíos”, de





Lorena Quintas; mostra de pintura de Xulio Fuentes; e “Mujeres en vanguardia. La Residencia de Señoritas en su centenario”, organizada por Acción Cultural Española.

9- VISITAS TEATRALIZADAS NOCTURNAS POLO MOSTEIRO DE CELANOVA E VILANOVA DOS INFANTES

Co fin de promover o coñecemento do patrimonio da vila, a Fundación Curros Enríquez organiza este ano varias visitas teatralizadas nocturnas polas dependencias do Mosteiro de San Salvador de Celanova. A visita remata cun diálogo no que un actor caracterizado de Manuel Curros Enríquez realiza un convite para seguir coñecendo o patrimonio de Celanova, principalmente o literario, visitando a Casa dos Poetas.

Tamén neste ano 2018 realizaranse visitas teatralizadas por Vilanova dos Infantes con dous protagonistas, un maestro zapateiro e a fotógrafa Ruth Anderson, que foi das primeiras en realizar fotografía etnográfica na vila de Celanova.

10.- OBRADOIRO DE POESÍA VISUAL

A Casa dos Poetas acollerá este ano 2018 un obradoiro de poesía visual impartido por Xosé Poldras, no que a fotografía e a poesía uniranse para crear unha obra metafórica visual da mensaxe do autor.

De acordo co artigo 26 da Lei de Subvencións non é posible promover a concorrência pública para a realización destas actividades dada a especificidade e exclusividade das actividades a realizar baseadas en criterio obxectivos, así coma o interese social das mesmas, xa que é a Fundación Curros Enríquez un referente exclusivo da vida e obra do autor, e polo tanto, a única que pode desenvolver as devanditas actividades na nosa comunidade autónoma.

Por iso, e de acordo coa planificación estratéxica realizada pola Secretaría Xeral de Cultura para o ano 2018, a sinatura deste convenio encádrase dentro dos previstos nese plan, nos que non é posible promover a concorrência polas especiais características da entidade coa que se convenía.

SEGUNDA.-OBRIGAS DA FUNDACIÓN CURROS ENRÍQUEZ

A Fundación Curros Enríquez comprométese, pola súa parte, a facer constar en toda a publicidade que xeren estas actividades –tanto impresa como audiovisual- a colaboración da Xunta de Galicia,





para o que utilizará a normativa da imaxe corporativa da Xunta de Galicia. Así mesmo, comprométese ao cumprimento das obrigas contidas na Lei 9/2007, do 13 de xuño, de subvencións de Galicia e en especial as recollidas no artigo 11 desta norma. Tamén será de aplicación o establecido no Decreto 11/2009, do 8 de xaneiro, en canto non se opoña á lexislación anterior. Con carácter supletorio, será de aplicación o disposto na Lei 38/2003 xeral de subvencións e no seu regulamento, aprobado polo Real Decreto 887/2006, do 21 de xullo.

A Fundación deberá dar cumprimento das obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

A Fundación ten a obriga de prestar colaboración e facilitar tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma e ao Consello de Contas.

A Fundación deberá presentar declaración responsable, para proceder á sinatura do convenio e para o seu pagamento, de estar ao día no cumprimento das obrigas tributarias e fronte á Seguridade Social e de non ter pendente de pagamento ningunha outra débeda coa Administración pública da Comunidade Autónoma, segundo o establecido no artigo 10 da Lei 9/2007, do 13 de xuño, de subvencións de Galicia e no artigo 11 do Decreto 11/2009, polo que se aproba o Regulamento da Lei 9/2007 de subvencións de Galicia. A declaración presentarse consonte o establecido no artigo 69.1 da Lei 39/2015, do 1 de outubro, do procedemento administrativo común das administracións públicas (Anexo I do convenio).

Así mesmo, de acordo co artigo 10 da Lei 9/2007, a Fundación deberá presentar unha declaración responsable de non estar incurso en ningunha das prohibicións para obter a condición de beneficiaria, sinaladas nos apartados 2 e 3 do citado artigo. Esta declaración deberá presentarse consonte o establecido no artigo 69.1 da Lei 39/2015, do 1 de outubro, do procedemento administrativo común das administracións públicas, antes da sinatura do convenio.





De acordo co artigo 38.3 da Lei 12/2006, do 1 de decembro, de fundacións de interese galego e co artigo 37.5 do Decreto 14/2009, do 21 de xaneiro, polo que se aproba o Regulamento do Rexistro de Fundacións de Interese Galego, con anterioridade á sinatura do convenio, será requisito indispensable, que a Fundación Curros Enríquez esté ao día no cumprimento das obrigas de presentación das contas do padroado, o cal se acreditará cunha declaración responsable do órgano competente da entidade.

A Fundación comprométese a destinar os fondos percibidos ao obxecto concreto para o que foron concedidos. A Consellería de Cultura, Educación e Ordenación Universitaria poderá comprobar, cando o considere pertinente, a execución das actividades obxecto deste convenio.

TERCEIRA.- FINANCIAMENTO

A Consellería de Cultura, Educación e Ordenación Universitaria comprométese a entregarlle á Fundación Curros Enríquez a cantidade de 15.000 € como contribución para a realización das actuacións culturais recollidas na estipulación primeira deste convenio e mantemento da entidade; esta achega financiarase, con fondos propios, con cargo ás seguintes aplicacións orzamentarias dos orzamentos xerais da Comunidade Autónoma de Galicia para 2018:

-10.20.432B.481.2: 5.000 €

-10.20.432B.781.1: 10.000 €

Segundo o disposto no artigo 63 do Decreto 11/2009, de 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a Consellería de Cultura, Educación e Ordenación Universitaria poderá realizar pagamentos anticipados que suporán achegas de fondos con carácter previo á xustificación, como financiamento necesario para poder levar a cabo as actuacións relacionadas co obxecto deste convenio. A cantidade máxima que se achegará como pago anticipado será de 9.000 € (4.000 € que corresponderá aos gastos de funcionamento da Fundación e 5.000 € que corresponderá aos gastos derivados das actuacións de carácter cultural).





A Fundación tamén poderá solicitar pagos á conta, segundo o previsto no artigo 62 do Decreto 11/2009, que responderán ao ritmo de execución das actividades subvencionadas aboándose pola contía equivalente á xustificación presentada. O importe conxunto dos pagamentos á conta e dos pagamentos anticipados que se concedan non poderá exceder do 80% da porcentaxe subvencionada correspondente aos pagos xustificados, ou sexa 12.000 €. O artigo 65.1 do Regulamento de subvencións de Galicia establece que os beneficiarios están obrigados á constitución de garantías cando se prevea a posibilidade de realizar pagamentos á conta ou anticipados; o artigo 65.4.i) recolle que quedarán exonerados da constitución de garantía os beneficiarios das subvencións concedidas cando os pagamentos non superen os 18.000 €.

No caso de que a Fundación solicite pagamentos anticipados deberá presentar unha memoria xustificativa e económica na que se recollan as actuacións que ten previsto realizar co custo das actividades.

CUARTA.-COMPATIBILIDADE

A obtención desta axuda é compatible coa obtención doutras axudas para este mesmo fin. A suma do conxunto das axudas solicitadas e/ou concedidas para o obxecto do convenio non poderá superar o 100% do custo da actividade a desenvolver.

QUINTA.- XUSTIFICACIÓN DOS GASTOS

A xustificación do cumprimento das condicións impostas e do seu custo deberá levarse a cabo de acordo co previsto nos artigos 28 e seguintes da Lei 9/2007. A data límite de presentación da documentación xustificativa da actividade e, se fora o caso, da xustificación dos gastos que restasen por aboar ata acadar o 100% da contía concedida, é o 15 de decembro de 2018.

A documentación requirida na fase xustificativa presentarase electronicamente na Carpeta do cidadán da persoa solicitante/representante, a través da sede electrónica da Xunta de Galicia <https://sede.xunta.gal>





A Fundación presentará electronicamente a xustificación da subvención dentro do prazo establecido e incluírá a seguinte documentación:

- Unha memoria de actuación xustificativa do cumprimento das condicións obxecto deste convenio, con indicación das actividades realizadas e dos resultados obtidos.
- Unha memoria económica xustificativa do custo das actividades realizadas, que conterá:
 - Unha relación clasificada dos gastos e investimentos da actividade, con identificación do acredor, importe, data de emisión e data de pagamento.
 - As facturas ou documentos de valor probatorio equivalente incorporados na relación á que se fai referencia no parágrafo anterior, e a documentación acreditativa do pagamento.
- Unha relación detallada doutros ingresos ou subvencións que financiasen a actividade subvencionada con indicación do importe e a súa procedencia. (Anexo II do convenio).

A presentación desta información é requisito imprescindible para a tramitación do pagamento, devolvendo toda a xustificación que non o cumpra.

Para que a consellería poida realizar os libramentos, a Fundación deberá achegar unha declaración responsable de titularidade de conta bancaria (Anexo III do convenio).

En todo o relativo aos gastos subvencionables deberá cumprirse o disposto no artigo 29 da Lei 9/2007, de 13 de xuño, de subvencións de Galicia (modificado pola Lei 12/2011, do 26 de decembro, de medidas fiscais e administrativas).

De conformidade co previsto na Lei 9/2007, de subvencións de Galicia, para efectos desta xustificación consideraranse os gastos realizados durante o ano 2018, dende o 1 de xaneiro ata a data límite de xustificación da axuda, que respondan á natureza da actividade subvencionada.

No caso de que a Fundación non xustifique ou a xustificación sexa insuficiente, procederá o reintegro das cantidades percibidas e a esixencia do xuro de demora correspondente dende o momento do pagamento de subvencións ata a data na que se acorde a procedencia do reintegro.





Cando a actividade fose financiada ademais de con esta subvención con fondos propios ou con outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades. O importe das subvencións en ningún caso poderá ser de tal contía que illadamente ou en concorrencia con outras subvencións, ingresos ou recursos, supere o custo da actividade subvencionada. En caso de superar, procederá o reintegro do exceso obtido sobre o custo da actividade subvencionada así como a esixencia do xuro de demora correspondente.

SEXTA.- COMISIÓN MIXTA DE SEGUIMIENTO

Créase unha comisión mixta de seguimento para aclarar as dúbidas derivadas da interpretación e execución deste convenio, formada polo secretario xeral de Cultura da Consellería de Cultura, Educación e Ordenación Universitaria, e polo presidente da Fundación.

SÉTIMA.-CAUSAS DE RESOLUCIÓN

O incumprimento de calquera das cláusulas deste convenio constituirá causa suficiente para a súa rescisión, e así mesmo procederá o reintegro da subvención cando concorra algunha das causas previstas no artigo 33 da Lei 9/2007, de 13 de xuño, de subvencións de Galicia.

OITAVA.-PUBLICIDADE

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno aberto da Xunta de Galicia incluíndo os datos identificativos das persoas asinantes.

Así mesmo, a Fundación Curros Enríquez, acepta a remisión do convenio, logo da súa sinatura, ao Rexistro de Convenios da Xunta de Galicia.





De acordo co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

Así mesmo, será obxecto de publicidade no Rexistro de Axudas, Subvencións e Convenios, ao abeiro do disposto no Decreto 126/2006, do 20 de xullo e no Decreto 132/2006, do 27 de xullo.

NOVENA.- XURISDICIÓN

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia e a súa normativa de desenvolvemento. Aplicarase con carácter supletorio a Lei 38/2003, do 17 de novembro, xeral de subvencións.

Ademais será de aplicación a Lei 40/2015, do 1 de outubro, de réxime xurídico do sector público.

Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.

DÉCIMA.-VIXENCIA

O período de vixencia deste convenio será dende a súa sinatura e ata o 31 de decembro de 2018, sen prexuízo de que se subvencionen as actividades realizadas dende o 1 de xaneiro de 2018.

DÉCIMO PRIMEIRA.-NOTIFICACIÓN ELECTRÓNICA

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios





electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Este convenio obriga ás partes que o asinan ao seu cumprimento, e ambas as dúas sométense ao acordado en todas as estipulacións. Esténdese en duplicado exemplar, no lugar e data arriba indicados.

O conselleiro de Cultura, Educación e
Ordenación Universitaria

O presidente da Fundación Curros
Enríquez

Román Rodríguez González

José Luis Ferro Iglesias

